


ALAHADY FAHA-6MANDAVANTAONA D 2025



ANDRIAMANITRA NO TENA MAHASAMBA IRA

FA TSY NY HAREN'NY TANY

Ry Kristianina havana, amin'izao Alahady mandavantaona tsotra fandalinam-pinoana ataontsika izao dia nibanjina manokana ny fiantsoan'Andriamanitra isika tamin'ny alahady lasa teo, nirahin'Andriamanitra isika ho mpanarato olona tahaka an'i Simona Piera, nirahina mba hamokatra tokoa isika raha miara-miasa amin'izy Andriamanitra. Raha manao ny asan'Andriamanitra isika dia Andriamanitra no hanao ny asantsika. Izany tokoa ny "vocation" dia ny fanatanterahana ny sitrak'Andriamanitra. Nilaza tamintsika I Jesoa tamin'ny Alahadyfaha-5 mandavantaona lasa teo "Alatsaho ny harato mirosoa amin'ny lalindalina

kokoa". Amin'izao Alahady faha-6 mandavantaona izao dia manasa antsika indray kosa ireo vakiteny arosan'ny Eglizy mba hiroso lalindalina kokoa isika eo anivon'ny fiainantsika satria irahina isika hikatsaka ny hasambarana. Ao anatin'izao taon-jobelin'ny famonjena no maheno an'izany hafatra lehibe izany

Vakiteny I Jer. 17, 5-8

Tononkira : Salamo 1

VakitenyII : 1 Kôr. 15, 12. 16-20

Evanjely : Lk. 6, 17. 20-26

isika. Azontsika onogna àry ny mahatonga an'i Papa François nanolotra ho teny Faneva manentana antsika dia ny hoe Mpivahinin'ny Fanantenana izay nohamafisiny tamin'ny taratasy fanentanana nosoratany : "tsy manodoka ny fanantenana". Finoana no andraisantsika ny famonjena fa ny fitiavana no ivelomantsika ka ny fanantenana no "ANGOVO" (moteur) manosika antsika hanatanteraka amin'ny andavanandrom-piainantsika. Zary lalana mitondra amin'ny fahamasinana, amin'ny hafaliana, amin'ny fiadanana.

Antintranterin'ny vakiteny androany fa ny tena hasambarana dia ao amin'Andriamanitra irery ihany, tsy misy harena mitondra amin'ny tena hasambarana sy fiadanana raha tsy ao amin'Andriamanitra. Voalazan'I Jeremia mpaminany ao amin'ny vakiteny voalohany“ *Ho voaozona izay olona mitoky amin'olombelona, ho soavina kosa mitoky amin'Andriamanitra*”. Izany tokoa isika olombelona miovaova, izao tontolo izao mamitaka. Fantatsika fa korontana vokatra ny fifangaroan-javatra no atolotr'izao tontolo izao. Izany no mahatonga antsika ho voaozona raha mifikitra amin'izao tontolo izao fa raha mifikitra amin'Andriamanitra dia tsy hiova izy, izany ny maha Andriamanitra azy. Anatra ho antsika izany, raha te ho génération mpanorina isika dia aoka hanorina amin'ny zavatra mari-potra mba tsy ho voahozongozona ny fiainantsika, Andriamanitra irery no tsy miova. Nilaza koa I Jeremia “*Manahaka ny anjavidy eny an-tany lava volo izy, ary rehefa misy hasambarana tonga, tsy ifaliany; honina amin'ny tany karankaina any an'efitra, any amin'ny tany sira, tsy misy mponina! Hohasoavina ny olona mitoky amin'ny Tompo, sy manantena ny Tompo ho tokiny! Manahaka ny hazo nambolena eo amoron-drano izy, mandatsaka ny vahany mankany amin'ny rano mandeha; tsy matahotra rehefa tonga ny hainandro, sady maitso ravina mandrakariva; tsy manahy izay taona fahamainana izy, ary tsy mitsahatra ny mamoa.*”

Izany tokoa ny tsodranon'Andriamanitra ho an'izay mifikitra aminy ary mahazo ny fiadanana mandrakizay. Ny lalana mankany amin'ny hasambarana no ambaran'I Jesoa amin'ny Evanjely raha namory ny olona marobe nanaraka azy izy. Matoa ny olona manaraka ny Tompo dia mba te-hahita sy hiaina ny hasambarana, tsy misy olona tsy mikatsaka hasambarana, samy te-ho sambatra ny olona jiaby.

Raha fintinina ny fampianaran'I Jesoa dia tsy hoe ny fananana zavatra rehetra izao no hasambarana fa miankina ny mahaanao anao, ka raha ny toetranao mifanaraka amin'ny sitrak'andriamanitra dia sambatra ianao. Izany no dikan'ireo hasambarana ampianarin'I Jesoa amintsika androany.

Inona no ambarany raha milaza izy fa sambatra ny mahantra, ary loza ho an'ny mpanankarena, tsy ny harena no ratsy fa rehefa izy no tompoina sy Andriamanitra dia mikorontana ny fiainantsika, tsy mahita fiadanana isika. Tsy ny fahantrana no tsara, tsy miantso amin'ny fahantrana Andriamanitra raha nahary antsika, fa napetrany tao amin'ny sahan'I Edena mba hanana ny rehetra. Tsy ny fahantrana no tadiavina eto fa ny toetranao mahantra, izany hoe mitoky amin'Andriamanitra satria izy no loharano sy fototry ny harena rehetra hanananao ary haterinao aminy ho fanasoavana ny hafa, izany no fahafoizana izay midika fahantrana eto, izany no toetra tian'i Jesoa ananantsika.

Sambatra ny noana fa loza kosa ho an'izay voky, sanatria tsy miantso hanoanana Andriamanitra fa indrindra amin'izao andro sarotra izao, fa ilay hanoanana toetra mikatsaka ny fahamarinana, noana ny fitiavana ny fampanjakana ny rariny sy ny hitsiny, ilay hanoanana mikatsaka mandrakariva amin'izay fanasoavana ny hafa. Io ilay hanoanana iantsoan'i Jesoa, ilay hanoanana mitondra fanantenana na indraindray tsy misy antenaina aza araka ny

voalazan’I Md Paoly rehefa niresaka momba an’I Abrahama izy. Io ilay hanoanana izay vokisan’Andriamanitra fa tsy araka ny hevitr’izao tontolo manosika antsika ho vavolombelon’ny fitapitaka, fialonana, fitsarahambelatsihy.... Raha te ho sambatra isika amin’izao androntsika izao dia aoka isika ho noana ny fahamarinana.

Sambatra ireo mitomany, tsy ny fitomaniana no tadiavana eto fa ilay fitomaniana mikatsaka ny rariny hatrany.

Sambatra raha ankahalain’ny olona ianareo fa ho lehibe ny valisoanareo, tsy mikatsaka ny fankahalana sanatria fa fijoroana ho vavolombelona no takina amintsika. Izany fijoroana izany no manelingelina ny hafa, izany tokoa I Jesoa, nanelingelina ny mpiara-belona izy ilay mpampianatra sy tompontsika nefa tsy voahozongozona ary fantantsika fa nandresy izy.

Aoka isika araky ny fampianaran’I Md Paoly ao amin’ny vakiteny faharoa “*Aoka isika hijoro ho vavolombelon’ny fitsanganan-ko velona*”, mahatonga antsika mifikitra amin’ireo fampianaran’I Jesoa dia satria velona miaraka amintsika Andriamanitra. Averimberintsika matetika fa izay no mahasamihafa ny finoantsika. Ny finoana hafa dia tsy eo anivony I Jesoa fa ny finoantsika dia I Jesoa velona no eo anivontsika. Izany no mahatonga antsika miatrika an’ireo izay mety hanilikilika antsika noho izany finoana izany, tsy hoe hiady amin’izy ireo isika fa manambara ny finoantsika, araka ny lazaintsika katolika aho ka ambarako sy iainako ny finoako. Izany no mitondra amin’ny hasambarana, tsy hoe nofinofy izany hasambarana ambaran’I Jesoa izany, tsy hoe “opium du people” araky ny fitenin’ireo manam-pahaizana, tsy nofinofy ny fivavahantsika satria nandresy ny ratsy I Jesoa.

Mety manontany isika aiza ary àry ireo hasambarana ireo ? tsy hitanay izay tokony hatao. Raha ny hamafin’izao tontolo izao dia resy isika fa matoky isika raha mampanjaka ny marina isika Kristianina rehetra sy vita batemy rehetra no manambara ny fifankatiavana dia handresy ny ratsy ary izany no maha génération mpanorina antsika, Eglizy OLona Velona isika velomin’ny finoana an’I Jesoa nandresy sy nitsangan-ko velona. Eo anivontsika I Jesoa, olona miara-belona amintsika Izy ka izany no ahafahantsika miaina tahaka Azy ka maniraka antsika mikatroka anatin’ireo vaomiera rafitra misy eo anivontsika indrindra ny vaomiera sosialy ho entintsika hanapotehana ny ratsy rehetra misy eo anivon’ny tontolo iainana, sy tontolom-piainana ary ny tontolom-pinoana fa manorina Eglizy Tranon’Andriamanitra izay tontolo sy zava-boahary velomintsika kosa isika, tontolom-piainana anjakan’ny rariny sy ny hitsiny ka hifampizarantsika amin’ny alalan’ny Caritas, Justice et Paix, ny diosezy maintso, mampijoro koa ny tontolom-pinoana ka hankalazantsika ny voninahitr’Andriamanitra tsy amin’ny hira fotsiny fa amin’ny fiainantsika manontolo, ny litorjia dia ilay eokaristia hivelomantsika amin’ny fiainantsika manontolo. Izany no hasambarana ka horaisintsika an-tànana tokoa ny fiainantsika hahatonga antsika ho Kristy mpiara-belona amin’olona. Izany rehetra izany no manosika antsika hirotsaka manatanteraka ny Sinaody faha-7 fijanonana faha-3 mba hahafahantsika mametraka ireo fifandraisana ireo ka hitondra antsika amin’ny fivelarana ny mahaolona sy amin’ny olona manontolo.

Ry Jesoa Kristy Tompo ô, nampianarinao anay ny làlana mankany amin'ny hasambarana, tsapanay fa tsy hoe fananana an'izao na fanaovana an'izao no hasambarana fa ny fiainanay ao aminao, ny toetranay, ny fanatanterahanay ny sitrak'Andriamanitra, ny fivelomana ny toe-piainana mahazanak'Andriamanitra, koa ampianaro àry izahay hampijoro izany finoana velona izany ho zary EOY tokoa izahay ka hizara ny hasambarana marina izany, ho EOY MIFAMPITSIMBINA, MIFANASOA KA MIKATSAKA MANDRAKARIVA NY SOA IOMBONANA. Enga anie hampieritreritra izao tontolo izao ireo teninao ary izahay amin'ny fiainanay hanaitra izao tontolo izao, ka hifampizara tokoa an'ireo hasambarana ireo hahatonga anay ho génération mpanorina ny tontolo iainana vaovao, mpanorina ny tontolom-piainana vaovao hanjakan'ny rariny sy ny hitsiny ary ny fifankatiavana, tontolom-pinoana hiderana sy hihirana ny voninahitr'Andriamanitra. Masina Maria, ampianaro izahay hitoetra ao amin'I Jesoa mandrakariva. Md Josefa, tantano ny fianakaviana hitoetra mandrakariva ao amin'ny fitiavan'Andriamanitra. Amen

Mompera Arseveka Benjamin Ramaroson